

三經同卷

維二

佛說賢首經

千佛因緣經

八大人覺經

佛說賢首經

卷二

乞伏秦沙門釋聖堅譯

聞如是一時佛在摩竭提國清淨法座處爾時都大會諸菩薩彌勒菩薩等比丘比丘尼優婆塞優婆夷諸天龍鬼神阿須倫共會佛

告舍利弗十方佛今日亦大會為諸菩薩說經清淨法座中有優婆夷名毘陀師利即滂沙國王夫人也叉手白佛言願欲聞十方佛名菩薩及刹土名佛言善哉善哉當為汝說之東方有佛名入精進刹名持討樹菩薩名敬首南方有佛名不捨樂精進刹名世念樹菩薩名覺首西方有佛名長精進刹名蓮華樹菩薩名寶首北方有佛名日精進刹名辛己樹菩薩名施首東北方有佛名哀精進刹名青蓮樹菩薩名功德首東南方有佛名百

藍精進刹名香樹菩薩名令首西南方有佛
名上精進刹名寶樹菩薩名精進首西北方
有佛名一度精進刹名思惟樹菩薩名善首
下方有佛名梵精進刹名水精樹菩薩名智
慧首毖陀師利聞十方佛名菩薩反刹土名
踊躍歡喜前以頭面著地爲佛作禮白佛言
我今雖發阿耨多羅三藐三菩提心當用何
行離母人身佛言善哉善哉是佛所問佛言
毖陀師利奉行十事可得離母人身有一事
行疾得男子自致阿耨多羅三藐三菩提何

等一事以發薩芸若意作無央數功德能不
望是爲一事復有二事母人疾得男子自致
阿耨多羅三藐三菩提何等二事一者所作
如語不事天但自歸諸佛二者所作不信邪
是爲二事復有三事母人疾得男子自致阿
耨多羅三藐三菩提何等爲三事一者常淨
護身三二者淨護口四三者淨護意三是爲
三復有四事母人疾得男子自致阿耨多羅
三藐三菩提何等四事一者所施與不諛諂
二者於戒不諛諂三者自守淨四者不諛諂

聽聞六法是爲四事復有五事母人疾得男子自致阿耨多羅三藐三菩提何等爲五事一者以用法二者所作如法三者聞法直住四者不樂母人身五者念作男子是爲五事復有六事母人疾得男子自致阿耨多羅三藐三菩提何等爲六事一者不懈怠所作而不妄二者其心柔軟三者質朴四者不諛諂五者無有態六者所作至誠是爲六事復有七事母人疾得男子自致阿耨多羅三藐三菩提何等爲七一者常念佛法身二者常念

法得佛慧三者常念僧爲來屬四者常念戒所求淨五者常念施與去諸垢六者常念天念菩薩心七者常念人欲一切度故是爲七事復有八事母人疾得男子自致阿耨多羅三藐三菩提何等爲八一者不以飲食被服自娛樂二者亦不華^{華二}三者亦不香^{香三}四者亦不衆雜香五者亦不嬉戲至觀廬六者亦不倡妓七者不歌舞八者但月六齋是爲八事復有九事母人疾得男子自致阿耨多羅三藐三菩提何等爲九一者無所斷二者無所著

三者無我四者不念有人五者不念有壽六者不念有命七者不念所生處八者不念無所生處九者但離十二因緣是爲九事復有十事母人疾得男子自致阿耨多羅三藐三菩提何等爲十一者爲有慈於一切二者不貪一切人物三者不念他人男子身四者不兩舌五者不惡口六者不妄言七者不綺語八者人持妓樂樂之不以爲樂九者亦不起意亦無所恨但正住十者不興邪因緣福事與人相知是爲十事佛說經竟毘陀師利摩

竭提國六萬優婆夷聞是法行皆發阿耨多羅三藐三菩提心諸菩薩彌勒等比丘比丘尼優婆塞優婆夷諸天龍鬼神阿須倫前持頭面著地爲佛作禮歡喜而去
佛說賢首經

千佛因緣經

姚秦三藏法師 鳩摩羅什 譯

如是我聞一時佛在王舍城耆闍崛山中與大比丘衆五千人俱其名曰尊者阿若憍陳如尊者優樓頻螺迦葉尊者伽耶迦葉尊者